

Vlada Kantona Sarajevo

Na osnovu člana 26. i 28. stav (1) Zakona o Vladi Kantona Sarajevo ("Službene novine Kantona Sarajevo", broj 36/14 - Novi prečišćeni tekst i 37/14 - Ispravka) i člana 6d. i 6e. stav (2) Zakona o plaćama i drugim naknadama sudija i tužilaca u Federaciji Bosne i Hercegovine ("Službene novine Federacije BiH", broj 72/05, 22/09, 55/13 i 61/22), Vlada Kantona Sarajevo, na 102. sjednici održanoj 17.11.2022. godine, donijela je

UREDBU O NAKNADAMA SUDIJA I TUŽILACA U PRAVOSUDNIM INSTITUCIJAMA U KANTONU SARAJEVO

Član 1.

(Predmet)

Ovom uredbom uređuje se visina naknade troškova za odvojen život od porodice i troškove smještaja u mjestu rada sudija, tužilaca i stručnih saradnika općinskih i kantonalnih sudova i kantonalnih tužilaštava (u daljem tekstu: pravosudne institucije u Kantonu Sarajevo), te visina, uvjeti i način ostvarivanja naknade na osnovu vremena provedenog u pripravnosti za rad srazmjerno vremenu trajanja pripravnosti za rad sudija i tužilaca u pravosudnim institucijama u Kantonu Sarajevo.

Član 2.

(Naknada za odvojeni život od porodice i smještaj u mjestu rada)

Sudije, tužioci i stručni saradnici iz člana 4. Zakona o plaćama i drugim naknadama sudija i tužilaca u Federaciji Bosne i Hercegovine ("Službene novine Federacije BiH", br. 72/05, 22/09, 55/13 i 61/22) (u daljem tekstu: Zakon) čije je mjesto prebivališta udaljeno više od 70 kilometara od mjesta pravosudne institucije u kojoj obavljaju dužnost imaju pravo na naknadu troškova za odvojen život od porodice i naknadu troškova smještaja u mjestu rada u visini od 250,00 KM.

Član 3.

(Naknada za pripravnost za rad)

- (1) Pripravnost za rad je poseban oblik rada, kada sudije i tužioci ne moraju biti prisutni na radnom mjestu, ali moraju biti dostupni radi obavljanja hitnih poslova.
- (2) Radnim vremenom ne smatra se vrijeme u kojem je sudija ili tužilac pripravan odazvati se pozivu pravosudne intitucije za obavljanje poslova, ako se ukaže takva potreba.
- (3) Naknada za pripravnost za rad sudija i tužilaca u pravosudnim institucijama u Kantonu Sarajevo utvrđuje se u odnosu na njihovu mjesečnu osnovnu plaću iz čl. 2. i 3. Zakona i iznosi:
 - a) za pripravnost za rad radnim danom u iznosu od 7% osnovne mjesečne plaće;
 - b) za pripravnost za rad u dane vikenda i praznika u iznosu od 9% osnovne mjesečne plaće.
- (4) U slučaju da se u toku trajanja pripravnosti pojavi potreba dolaska na radno mjesto i potreba za radom, takav rad tretira se kao prekovremeni rad i obračunava se i isplaćuje kao prekovremeni rad.
- (5) Pripravnost za rad radnim danima traje 16 sati, a subotom, nedjeljom i praznikom 24 sata.
- (6) Pripravnost sudije, odnosno tužioca može se odrediti i na sedmičnom nivou, u trajanju od sedam dana, ili na kraći vremenski period.
- (7) Rukovodilac pravosudne institucije donosi u tekućem mjesecu za naredni mjesec Plan pripravnosti sa obaveznom naznakom jednakog vremenskog rasporeda za naredni mjesec prema abecednom redu sudija ili tužilaca.

Član 4.

(Rješenje)

- (1) Naknade predvidene u odredbama čl. 2. i 3. ove uredbe ostvaruju se donošenjem rješenja, jedanput mjesečno.
- (2) Rješenje iz stava (1) ovog člana donosi rukovodilac pravosudne institucije.

Član 5.

(Stupanje na snagu)

Ova uredba stupa na snagu 01.01.2023. godine, a objavit će se u "Službenim novinama Kantona Sarajevo".

Broj 02-04-46633-3/22

17. novembra 2022. godine

Sarajevo

Premijer

Edin Forto, s. r.